

## ॥द्वितीयः प्रश्नः॥

### ॥तैत्तिरीयसंहितायां प्रथमकाण्डे द्वितीयः प्रश्नः॥

आपं उ॒न्दन्तु जी॒वसे॑ दी॒र्घायु॑त्वाय॒ वर्च॑स॒ ओष॑धे॒ त्राय॑स्वैन॒ऽ  
स्वधि॑ते॒ मेन॑ः॒ हि॒ऽसी॑र्दे॒वश्रू॑रे॒तानि॒ प्र व॑पे स्व॒स्त्युत्तरा॑ण्यशी॒याऽऽ॒-  
पो॑ अ॒स्मान्मा॒तरः॑ शु॒न्धन्तु॒ घृते॑न॒ नो घृ॑त॒पुवः॑ पु॒नन्तु॒ विश्व॑म॒स्मत्प्र  
व॑हन्तु रि॒प्रमुदा॑भ्यः शुचि॒रा पू॒त ए॑मि॒ सोम॑स्य॒ तनू॑र॒सि त॒नुवं॑ मे  
पाहि॒ मही॑नां॒ पयो॑ऽसि॒ वर्चो॑धा अ॒सि वर्चो॑ (१)

मयि॑ धेहि वृ॒त्रस्य॑ क॒नीनि॑काऽसि॒ चक्षु॑ष्पा अ॒सि चक्षु॑र्मे  
पाहि॒ चि॒त्पति॑स्त्वा पु॒नातु॒ वा॒क्पति॑स्त्वा पु॒नातु॒ दे॒वस्त्वा॑ सवि॒ता  
पु॒ना॒त्वच्छि॑द्रेण॒ पवि॑त्रेण॒ वसोः॑ सूर्य॑स्य॒ रश्मि॑भि॒स्तस्य॑ ते पवि॒त्रप॑ते  
प॒वि॒त्रेण॒ यस्मै॒ कं पु॑ने॒ तच्छ॑केय॒मा वो॑ दे॒वास ई॑महे॒ सत्य॑ध॒र्माणो॑  
अध्व॑रे॒ यद्वो॑ दे॒वास आ॑गुरे॒ यज्ञि॑यासो॒ हवा॑मह॒ इन्द्रा॑ग्नी॒ द्यावा॑पृथि॒वी  
आपं॑ ओषधी॒स्त्वं दी॒क्षाणा॑मधि॒पति॑रसी॒ह मा॒ सन्तं॑ पाहि॥ (२)

वर्च॑ ओषधीरु॒ष्टौ च॑॥२॥ [१]

आकू॑त्यै प्र॒युजे॑ऽग्नये॒ स्वाहा॑ मे॒धायै॒ मन॑से॒ऽग्नये॒ स्वाहा॑  
दी॒क्षायै॒ तप॑से॒ऽग्नये॒ स्वाहा॑ सर॒स्वत्यै॒ पूष्णे॑ऽग्नये॒ स्वाहा॑ऽऽपो॑  
दे॒वीर्बृ॑हतीर्वि॒श्वश॑म्भुवो॒ द्यावा॑पृथि॒वी उ॒र्वन्तरि॑क्षं॒ बृह॑स्पति॒र्नो ह॒विषा॑  
वृ॒धातु॑ स्वाहा॒ विश्वे॑ दे॒वस्य॑ ने॒तुर्म॑र्तोऽवृणीत॒ स॒ख्यं विश्वे॑ रा॒य

इषुध्यसि द्युम्नं वृणीत पुष्यसे स्वाहर्त्सामयोः शिल्पे स्थस्ते वामा  
रभे ते मां (३)

पातमाऽस्य यज्ञस्योदृचं इमां धियं शिक्षमाणस्य देव क्रतुं  
दक्षं वरुणं सः शिंशाधि ययाऽति विश्वा दुरिता तरेम सुतर्माणमधि  
नावः रुहेमोर्गस्याङ्गिरस्यूर्णम्रदा ऊर्जं मे यच्छ पाहि मा मा मां  
हिः सीर्विष्णोः शर्मासि शर्म यजमानस्य शर्म मे यच्छ नक्षत्राणां  
माऽतीकाशात् पाहीन्द्रस्य योनिंरसि (४)

मा मां हिः सीः कृष्यै त्वां सुसस्यायै सुपिप्पलाभ्युस्त्वौष-  
धीभ्यः सूपस्था देवो वनस्पतिरूर्ध्वो मां पाह्योदृचः स्वाहा यज्ञं  
मनसा स्वाहा द्यावापृथिवीभ्याः स्वाहोरोरन्तरिक्षाः स्वाहा यज्ञं  
वातादा रभे॥ (५)

मा योनिंरसि त्रिंशच्च॥३॥ [२]

दैवीं धियं मनामहे सुमृडीकामभिष्टये वर्चोधां यज्ञवाहसं  
सुपारा नो असद्विशै। ये देवा मनोजाता मनोयुजः सुदक्षा  
दक्षपितारस्ते नः पान्तु ते नोऽवन्तु तेभ्यो नमस्तेभ्यः स्वाहाऽग्ने  
त्वः सु जागृहि वयं सु मन्दिषीमहि गोपाय नः स्वस्तये प्रबुधै  
नः पुनर्ददः। त्वमग्ने व्रतपा असि देव आ मर्त्येष्व। त्वं (६)

यज्ञेष्वीड्यः॥ विश्वे देवा अभि मा माऽववृत्रन् पूषा सन्या  
सोमो राधसा देवः संविता वसोर्वसुदावा रास्वेयं सोमाऽऽभूयो

भ॒र॒ मा॒ पृ॒ण॒न्मृ॒त्या॒ वि॒ रा॒धि॒ मा॒ऽह॒मायु॑षा च॒न्द्रम॑सि॒ मम॒ भो॒गाय॑  
 भव॒ वस्त्र॑मसि॒ मम॒ भो॒गाय॑ भवो॒स्त्राऽसि॒ मम॒ भो॒गाय॑ भव॒ ह्यो॑ऽसि॒  
 मम॒ भो॒गाय॑ भव॒ (७)

छा॒गो॑ऽसि॒ मम॒ भो॒गाय॑ भव॒ मे॒षो॑ऽसि॒ मम॒ भो॒गाय॑ भव॒  
 वा॒यवे॑ त्वा॒ वरु॑णाय॒ त्वा॒ नि॒र॒ऋ॒त्यै॒ त्वा॒ रु॒द्राय॑ त्वा॒ दे॒वी॒रापो॑  
 अ॒पां न॒पा॒द्य ऊ॒र्मि॒र॒ह॒वि॒ष्य॑ इन्द्रि॒यावा॑न्म॒दि॒न्त॑म॒स्तं वो॒ मा॒  
 ऽव॑क्रमिष॒मच्छि॑न्नं तन्तुं पृथि॒व्या अनु॑ गे॒षं भ॒द्रा॒द॒भि॒ श्रेयः॑ प्रेहि  
 बृ॒ह॒स्प॒तिः पुर॑ए॒ता ते॑ अ॒स्त्वथे॑म॒व॒ स्य॒ वर॒ आ पृ॑थि॒व्या आ॒रे  
 शत्रू॑न्कृणुहि॒ सर्व॑वी॒र ए॒दम॑गन्म॒ देव॑य॒जनं॑ पृथि॒व्या वि॒श्वे दे॒वा  
 यद॑जुषन्त॒ पूर्वं॑ ऋ॒क्स॒माभ्यां॑ यजु॑षा स॒न्तर॑न्तो रा॒य॒स्पोषे॑ण॒  
 स॒मि॒षा म॑देम॥ (८)

आ त्व९ ह्यो॑ऽसि॒ मम॒ भो॒गाय॑ भव॒ स्य॒ पञ्च॑वि॒ंश॒तिश्च॥३॥ [३]

इ॒यं ते॑ शु॒क्र त॒नू॒रि॒दं वर्च॑स्तया॒ सं भ॑व॒ भ्राज॑ गच्छ॒ जूर॑सि  
 धृ॒ता मन॑सा॒ जुष्टा॒ विष्ण॑वे॒ तस्या॑स्ते स॒त्यस॑वसः प्रस॒वे वा॒चो  
 य॒न्नम॑शीय॒ स्वाहा॑ शु॒क्रम॑स्य॒मृत॑मसि॒ वैश्व॑देव९ ह॒विः सूर्य॑स्य॒  
 चक्षु॑राऽरु॒हम॑ग्रे॒रक्ष॑णः क॒नी॒निकां॑ यदे॒त॒शेभि॑रीय॒से भ्राज॑मानो  
 वि॒प॒श्चि॒ता चि॑द॒सि म॒नाऽसि॒ धी॒र॒सि दक्षि॑णा- (९)

ऽसि॒ य॒ज्ञि॒याऽसि॒ क्ष॒त्रि॒याऽस्य॑दि॒तिर॑स्युभ॒यतः॑शी॒र्ष्णी सा  
 नः॒ सु॒प्रा॑ची॒ सु॒प्री॑तीची॒ सं भ॑व॒ मि॒त्र॒स्त्वा प॒दि ब॑ध्नातु पू॒षाऽध्व॑नः

पा॒त्विन्द्रा॒याध्य॑क्षा॒यानु॑ त्वा मा॒ता म॑न्यता॒मनु॑ पि॒ताऽनु॑ भ्रा॒ता  
सग॒भ्योऽनु॑ सखा॒ सयू॑ध्यः सा दै॒वि दे॒वम॑च्छेहीन्द्रा॒य सोम॑ः  
रु॒द्रस्त्वाऽऽव॑र्तयतु मि॒त्रस्य॑ प॒था स्व॒स्ति सोम॑सखा पुन॒रेहि॑ स॒ह  
र॒य्या॥ (१०)

दक्षिणा सोमसखा पञ्च च॥२॥ [४]

वस्व्य॑सि रु॒द्राऽस्य॑दि॒तिर॑स्यादि॒त्याऽसि॑ शु॒क्राऽसि॑ चन्द्रा॒ऽसि  
बृ॒हस्प॑ति॒स्त्वा सु॒मे र॑ण्वतु रु॒द्रो वसु॑भिरा चि॒केतु॑ पृथि॒व्यास्त्वा  
मूर्ध॑न्ना जि॒घर्मि॑ दे॒वय॑जन् इडा॒याः प॒दे घृ॒तव॑ति स्वाहा  
परि॑लिखितः रक्षः परि॑लिखिता अरा॑तय इ॒दम॑हः रक्ष॑सो  
ग्री॒वा अपि॑ कृ॒न्तामि॒ योऽस्मान् द्वेष्टि॑ यं च व॒यं द्विष्म॑ इ॒दम॑स्य  
ग्री॒वा (११)

अपि॑ कृ॒न्ताम्य॒स्मे रा॒यस्त्वे रा॒यस्तो॑ते रा॒यः सं दै॒वि दे॒व्योर्व॑श्या  
पश्य॑स्व त्वष्टी॑मती ते सपे॒य सुरे॑ता॒ रेतो॑ दधा॒ना वी॒रं वि॑दे॒य तव॑  
स॒न्दशि॒ माऽह॑ः रा॒यस्पोषे॑ण॒ वि योष॑म्॥ (१२)

अस्य ग्रीवा एकात्रिंशच्च॥२॥ [५]

अ॒ःशुना॑ ते अ॒ःशुः पृ॒च्यतां॑ परु॒षा परु॑र्गन्ध॒स्ते का॒मम॑वतु  
मदा॑य॒ रसो॒ अच्यु॑तोऽमा॒त्योऽसि॑ शु॒क्रस्ते॒ ग्रहो॑ऽभि त्यं दे॒वः  
संवि॑तार॑मू॒ण्योः क॒विक्र॑तुम॒र्चामि॑ स॒त्यसं॑वसः रत्न॑धा॒मभि॑ प्रि॒यं  
म॒तिमूर्ध्वा॑ यस्या॒मति॑र्भा अदि॑द्युत॒त्सवी॑मनि॒ हिर॑ण्यपा॒णिर॑मिमीत

सुक्रतुः कृपा सुवः। प्रजाभ्यस्त्वा प्राणाय त्वा व्यानाय त्वा  
प्रजास्त्वमनु प्राणिहि प्रजास्त्वामनु प्राणन्तु॥ (१३)

अनु सप्त च॥१॥ [६]

सोमं ते क्रीणाम्यूर्जस्वन्तं पयस्वन्तं वीर्यावन्तमभिमाति-  
षाह९ शुक्रं ते शुक्रेण क्रीणामि चन्द्रं चन्द्रेणामृतममृतेन  
सम्यत्ते गोरस्मे चन्द्राणि तपसस्तनूरसि प्रजापतेर्वर्णस्तस्यास्ते  
सहस्रपोषं पुष्यन्त्याश्चरमेणं पशुना क्रीणाम्यस्मे ते बन्धुर्मयि  
ते रायः श्रयन्तामस्मे ज्योतिः सोमविक्रयिणि तमो मित्रो न  
एहि सुमित्रधा इन्द्रस्योरु मा विश दक्षिणमुशन्नुशन्त९ स्योनः  
स्योन९ स्वान् भ्राजाङ्घारे बम्भारे हस्त सुहस्त कृशानवेते वः  
सोमक्रयणास्तात्रक्षध्वं मा वो दमन्न॥ (१४)

ऊरुं द्वाविंशतिश्च॥१॥ [७]

उदायुषा स्वायुषोदोषधीना९ रसेनोत्पर्जन्यस्य शुष्मेणोदस्था-  
ममृता९ अनु। उर्वन्तरिक्षमन्विह्यदित्याः सदोऽस्यदित्याः सद  
आसीदास्तभ्राद्यामृषभो अन्तरिक्षममिमीत वरिमाणं पृथिव्या  
आसीदद्विश्वा भुवनानि सम्राड्विश्वेत्तानि वरुणस्य व्रतानि वनेषु  
व्यन्तरिक्षं ततान् वाजमर्वथ्सु पयो अघ्नियासु हृथ्सु (१५)

क्रतुं वरुणो विक्ष्वग्निं दिवि सूर्यमदधात्सोममद्रावुदुत्यं  
जातवेदसं देवं वहन्ति केतवः। दृशे विश्वाय सूर्यम्॥ उस्त्रावेतं

धूर्षाहावन॒श्रू अवीर॑हणौ ब्रह्म॒चोद॑नौ वरु॑णस्य॒ स्कम्भ॑नमसि॒  
वरु॑णस्य॒ स्कम्भ॑सर्जनमसि॒ प्रत्य॑स्तो वरु॑णस्य॒ पाशः॑॥ (१६)

हृथ्मु पञ्चत्रिंशच्च॥२॥ \_\_\_\_\_[८]

प्रच्य॑वस्व भुव॑स्पते॒ विश्वा॑न्यभि॒ धामा॑नि॒ मा त्वा॑ परिप॒री  
वि॒दन्मा॑ त्वा॑ परिप॒न्थिनो॑ वि॒दन्मा॑ त्वा॒ वृका॑ अघा॒यवो॒ मा गन्ध॑र्वो  
वि॒श्वाव॑सुरा द॒घच्छे॑नो भू॒त्वा परा॑ पत॒ यज॑मानस्य नो गृ॒हे  
दे॒वैः सङ्स्कृ॑तं यज॑मानस्य स्व॒स्त्यय॑न्यस्यपि॒ पन्था॑मगस्महि  
स्वस्ति॑गाम॒नेह॑सं येन॒ विश्वाः॑ परि॒ द्विषो॑ वृ॒णक्ति॑ वि॒न्दते॑ वसु॒ नमो॑  
मि॒त्रस्य॑ वरु॑णस्य॒ चक्ष॑से म॒हो दे॒वाय॑ तदृ॒तं संप॑र्यत दूरे॒दृशे॑ दे॒व-  
जा॑ताय के॒तवे॑ दि॒वस्पु॑त्राय॒ सूर्या॑य श॒सत॑ वरु॑णस्य॒ स्कम्भ॑नमसि॒  
वरु॑णस्य॒ स्कम्भ॑सर्जनम॒स्युन्मु॑क्तो वरु॑णस्य॒ पाशः॑॥ (१७)

मित्रस्य त्रयोविंशतिश्च॥१॥ \_\_\_\_\_[९]

अ॒ग्नेरा॑तिथ्यम॒सि वि॒ष्णवे॑ त्वा॒ सोम॑स्याऽऽतिथ्यम॒सि वि॒ष्णवे॑  
त्वाऽति॑थेरातिथ्यम॒सि वि॒ष्णवे॑ त्वाऽ॒ग्नये॑ त्वा॒ राय॑स्पोष॒दाञ्जे॑ वि॒ष्णवे॑  
त्वा श्ये॑नाय॒ त्वा सोम॑भृते॒ विष्ण॑वे त्वा॒ या ते॑ धामा॑नि ह॒विषा॑  
यज॑न्ति॒ ता ते॑ विश्वा॑ परि॒भूर॑स्तु य॒ज्ञं ग॑य॒स्फार्नः॑ प्र॒तर॑णः सु॒वीरो-  
ऽवीर॑हा प्र च॑रा सोम॒ दुर्या॑नदि॒त्याः सदो॑ऽस्यदि॒त्याः सद॑ आ (१८)

सी॒द वरु॑णोऽसि धृ॒तव्र॑तो वा॒रुण॑म॒सि श॑योर्दे॒वाना॑ं स॒ख्यान्मा॑  
दे॒वाना॑म॒पसं॑श्छि॒ध्मह्या॑प॒तये॑ त्वा गृ॒ह्णामि॑ परि॒पतये॑ त्वा गृ॒ह्णामि॑

तनून॑त्रे॒ त्वा गृ॒ह्णामि॑ शा॒क्राय॑ त्वा गृ॒ह्णामि॑ श॒क्मन्नो॑जि॒ष्ठाय॑ त्वा  
गृ॒ह्णाम्यना॑धृष्ट॒मस्य॑नाधृ॒ष्यं दे॒वाना॑मो॒जोऽभि॑शस्ति॒पा अ॑न॒भि॒शस्ते॒-  
ऽन्य॑मनु॒ मे दी॒क्षां दी॒क्षाप॑तिर्मन्यता॒मनु॒ तप॑स्तप॑स्पतिर॒ञ्जसा॑  
स॒त्यमु॑प॒ गेष॑ सु॒विते॒ मा धाः॥ (१९)

आ मैकं च॥२॥ [१०]

अ॒५शु॒र५शु॒स्ते दे॒व सो॒माऽऽप्या॑यता॒मिन्द्रा॑यै॒कध॑न॒विद्  
आ तु॒भ्यमिन्द्रः॑ प्यायता॒मा त्वमिन्द्रा॑य प्याय॒स्वाऽऽप्या॑यय  
सखी॑न्त्स॒न्या मे॒धया॑ स्व॒स्ति ते॑ दे॒व सोम॑ सु॒त्याम॑शी॒येष्टा॑ रा॒यः  
प्रेषे॑ भ॒गाय॑र्तमृ॒तवा॑दि॒भ्यो नमो॑ दि॒वे नमः॑ पृथि॒व्या अ॒ग्ने व्र॑तपते  
त्वं व्र॑ताना॑ व्र॒तप॑तिरसि॒ या मम॑ त॒नूरे॑षा सा त्वयि॒ (२०)

या तव॑ त॒नूरि॑य॒ सा मयि॑ स॒ह नौ॑ व्रतपते व्र॒तिनो॑व्र॒तानि॒ या  
ते॑ अ॒ग्ने रु॒द्रिया॑ त॒नूस्त॑या॒ नः पाहि॑ तस्या॑स्ते॒ स्वाहा॒ या ते॑ अ॒ग्ने-  
ऽया॑श॒या र॑जाश॒या ह॑राश॒या त॒नूर्व॑र्षि॒ष्ठा ग॒ह्वरे॑ष्ठो॒ग्रं वचो॑ अ॒पाव॑धीं  
त्वेषं॑ वचो॒ अ॒पाव॑धी॒ऽ स्वाहा॑॥ (२१)

त्वयि चत्वारि५शच्च॥२॥ [११]

वि॒त्ताय॑नी मे॒ऽसि ति॒क्ताय॑नी मे॒ऽस्य॑व॒तान्मा॒ नाथि॑तम॒व॒तान्मा॒  
व्यथि॑तं वि॒देर॒ग्निर्न॑भो॒ नामा॑ग्ने अ॒ङ्गिरो॒ योऽस्यां॑ पृथि॒व्याम॑स्याऽऽ-  
यु॒षा नाम्ने॑हि॒ यत्ते॑ऽनाधृष्टं॒ नाम॑ य॒ज्ञियं॑ तेन॒ त्वाऽऽद॑धे॒ऽग्ने अ॒ङ्गिरो॒  
यो द्वि॑तीय॒स्यां तृ॑तीय॒स्यां पृथि॒व्याम॑स्याऽऽयु॒षा नाम्ने॑हि॒ यत्ते॑ऽनाधृष्टं॒  
नाम॑ (२२)

यज्ञियं तेन त्वाऽऽदधे सि॒ःहीर॑सि महि॒षीर॑स्युरु प्र॒थस्वो॒रु  
 तै य॒ज्ञप॑तिः प्रथतां ध्रुवाऽसि॑ दे॒वेभ्यः॑ शु॒न्धस्व दे॒वेभ्यः॑  
 शु॒म्भस्वेन्द्र॑घोषस्त्वा वसु॑भिः पुरस्ता॑त्पातु मनो॑जवास्त्वा  
 पि॒तृभिर्दक्षि॑णतः पा॑तु प्रचे॑तास्त्वा रु॒द्रैः प॒श्चात्पा॑तु वि॒श्वक॑र्मा त्वा-  
 ऽऽदि॒त्यैरु॑त्तरतः पा॑तु सि॒ःहीर॑सि स॒पत्नसा॒ही स्वाहा॑ सि॒ःहीर॑सि  
 सु॒प्रजा॒वनिः॒ स्वाहा॑ सि॒ःही- (२३)

र॑सि रा॒यस्पोष॑वनिः स्वाहा॑ सि॒ःहीर॑स्यादि॒त्यव॑निः स्वाहा॑  
 सि॒ःहीर॑स्या व॒ह दे॒वान्दे॒वय॑ते यज॑मानाय॒ स्वाहा॑ भू॒तेभ्य॑स्त्वा  
 वि॒श्वायु॑र॒सि पृथि॑वीं द॒ःह ध्रुव॑क्षिद॒स्यन्तरि॑क्षं द॒ःहाच्यु॑त॒क्षिद॑सि  
 दि॒वं द॒ःहाग्ने॑र्भस्मा॑स्य॒ग्नेः पु॒रीष॑मसि॥ (२४)

नामं सुप्रजावनिः स्वाहा॑ सि॒ःहीः पञ्च॑त्रि॒ंशच्च॥३॥ [१२]

यु॒ञ्जते॒ मन॑ उ॒त यु॒ञ्जते॒ धियो॒ विप्रा॒ विप्र॑स्य बृ॒हतो॒ विप॑श्चितः।  
 वि हो॒त्रा दधे॑ व॒युना॒विदे॑क॒ इन्म॒ही दे॒वस्य॑ सवि॒तुः परि॑ष्टुतिः॥  
 सु॒वाग्दे॒व दुर्या॑ः आ व॑द दे॒वश्रु॑तौ दे॒वेष्वा घो॑षेथा॒मा नो॑ वी॒रो  
 जा॑यतां क॒र्मण्यो॑ यः स॒र्वेऽनु॑जीवा॒म यो ब॑हूना॒मस॑द्व॒शी। इ॒दं  
 विष्णु॑र्वि च॒क्रमे॑ त्रे॒धा नि द॑धे प॒दम्। स॒मूढ॑मस्य (२५)

पा॑ःसुर इ॒राव॑ती धे॒नुम॑ती हि भू॒तः सू॒यव॑सिनी॒ मन॑वे यश॒स्यै।  
 व्य॑स्क॒भ्राद्रो॑द॒सी विष्णु॑रे॒ते दा॑धार॒ पृथि॑वीम॒भितो॑ म॒यूखैः॑॥ प्राची॑  
 प्रे॒तम॑ध्व॒रं क॒ल्पय॑न्ती ऊ॒र्ध्वं य॒ज्ञं न॑यत॒ मा जी॑ह्वर॒तम॑त्र॒ रमे॑था॒



वर्ष्मन्पृथिव्या दिवो वा विष्णवुत वा पृथिव्या महो वा विष्णवुत  
वाऽन्तरिक्षाद्धस्तौ पृणस्व बहुभिर्वसव्यैरा प्र यच्छ (२६)

दक्षिणादोत सव्यात्। विष्णोर्नुकं वीर्याणि प्र वोचं यः  
पार्थिवानि विममे रजांसि यो अस्कंभायदुत्तरं सधस्थं  
विचक्रमाणस्त्रेधोरुगायो विष्णो रराटमसि विष्णोः पृष्ठमसि विष्णोः  
श्जत्रे स्थो विष्णोः स्यूरसि विष्णोर्ध्रुवमसि वैष्णवमसि विष्णवे  
त्वा॥ (२७)

अस्य यच्छैकान्नचत्वारिंशच्च॥३॥ [१३]

कृणुष्व पाजुः प्रसितिं न पृथ्वीं याहि राजेवामवा इमेन।  
तृष्णीमनु प्रसितिं द्रूणानोऽस्तांसि विध्यं रक्षसस्तपिष्ठैः॥ तवं  
भ्रमासं आशुया पतन्त्यनु स्पृश धृषता शोशुचानः। तपूष्यग्रे  
जुह्वा पतङ्गानसन्दितो वि सृज विष्वगुल्काः॥ प्रति स्पशो वि  
सृज तूर्णितमो भवा पायुर्विशो अस्या अदब्धः। यो नो दूरे  
अघशंसो (२८)

यो अन्त्यग्रे माकिष्टे व्यथिरा दधर्षीत्। उदग्रे तिष्ठ  
प्रत्याऽऽतनुष्व न्यमित्रा ओषतात्तिग्महेते। यो नो अरातिं  
समिधान चक्रे नीचा तं धक्ष्यतुसं न शुष्कम्॥ ऊर्ध्वो भव प्रति  
विध्याध्यस्मदाविष्कृणुष्व दैव्यान्यग्रे। अव स्थिरा तनुहि यातुजूनां  
जामिमजामिं प्र मृणीहि शत्रून्॥ स ते (२९)

जानाति सुमतिं यंविष्ट य ईवते ब्रह्मणे गातुमैरत्। विश्वान्यस्मै  
 सुदिनानि रायो द्युम्रान्यर्यो वि दुरो अभि द्यौत्॥ सेदग्ने अस्तु सुभगः  
 सुदानुर्यस्त्वा नित्येन हविषा य उक्थैः। पिप्रीषति स्व आयुषि दुरोणे  
 विश्वेदस्मै सुदिना साऽसदिष्टिः॥ अर्चामि ते सुमतिं घोष्यर्वाख्यं  
 ते वावाता जरता- (३०)

मियङ्गीः। स्वश्वास्त्वा सुरथा मर्जयेमास्मे क्षत्राणि धारयेरनु  
 द्यून्॥ इह त्वा भूर्या चरेदुप त्मन्दोषावस्तर्दीदिवाऽसमनु द्यून्।  
 कीडन्तस्त्वा सुमनसः सपेमाभि द्युम्रा तस्थिवाऽसो जनानाम्॥  
 यस्त्वा स्वश्वः सुहिरण्यो अग्न उपयाति वसुमता रथेन। तस्य  
 त्राता भवसि तस्य सखा यस्त आतिथ्यमानुषगजुजौषत्॥ महो  
 रुजामि (३१)

बन्धुता वचोभिस्तन्मा पितुर्गोतमादन्वियाय॥ त्वं नो अस्य  
 वचसश्चिकिद्धि होतर्यविष्ट सुक्रतो दमूनाः॥ अस्वंप्रजस्तरणयः  
 सुशेवा अतन्द्रासोऽवृका अश्रमिष्ठाः। ते पायवः सध्रियश्चो निषद्या-  
 ऽग्ने तवं नः पान्त्वमूर॥ ये पायवो मामतेयं ते अग्ने पश्यन्तो अन्धं  
 दुरितादरक्षन्। ररक्ष तान्सुकृतो विश्ववेदा दिप्सन्त इद्रिपवो ना  
 हं (३२)

देभुः॥ त्वया वयं सध्न्यस्त्वोतास्तव प्रणीत्यश्याम् वाजान्।  
 उभा शंसां सूदय सत्यतातेऽनुष्ठुया कृणुह्यहयाण॥ अया ते अग्ने  
 समिधा विधेम प्रति स्तोमं शस्यमानं गृभाय। दहाशसो रक्षसः

पा॒ह्य॑स्मान्द्रु॒हो नि॒दोऽमि॑त्रम॒हो अव॑द्यात्॥ र॒क्षो॒हणं॑ वा॒जिन॑माऽऽ-  
जि॑घर्मि मि॒त्रं प्रथि॑ष्ठमुपं॒ यामि॑ शर्म॑। शिशा॑नो अ॒ग्निः क्रतु॑भिः  
समि॑द्धः स नो॒ दिवा॒ (३३)

स रि॒षः पा॑तु नक्तम्॥ वि ज्योति॑षा बृ॒हता भा॑त्य॒ग्निरा॒विर्वि॑श्वानि  
कृ॒णुते॑ महि॒त्वा। प्रादे॑वीर्मा॒याः स॑हते दुरे॒वाः शिशी॑ते शृ॒ङ्गे रक्ष॑से  
वि॒निक्षे॑॥ उ॒त स्वा॒नासो॑ दि॒विष॑न्त्व॒ग्रेस्ति॒ग्मायु॑धा रक्ष॑से हन्त॒वा उ॑।  
मदे॑ चिदस्य॒ प्ररु॑जन्ति॒ भामा॒ न वर॑न्ते परि॒बाधो॑ अदे॒वीः॥ (३४)

अ॒घश॑स्सः स ते॑ जरता॑ रुजामि॒ ह दि॒वैक॑चत्वारि॑शच्च॥७॥ [१४]

आपं॑ उ॒न्दन्वाकू॑त्यै दे॒वीमि॑यं ते वस्व्य॑स्य॒शुनां॑ ते सोम॑न्त उ॒दायु॑षा प्र च्य॑वस्वा॒ग्रेराति॑थ्यम्॒शुर॑  
शुर्वि॑त्ताय॑नी मेसि॒ युञ्जते॑ कृ॒णुष्व॒ पाज॑श्चतु॒र्दश॥१४॥

आपो॑ वस्व्य॑सि॒ या तवे॒यङ्गीश्चतु॑स्त्रि॑शत्॥३४॥

आपं॑ उ॒न्दन्वदे॒वीः॥

हरिः॑ ॐ॥

॥कृष्ण-यजुर्वेदीय-तैत्तिरीय-संहितायां प्रथमकाण्डे द्वितीयः प्रश्नः  
समाप्तः॥१-२॥



generated on January 25, 2026

Downloaded from



<http://stotrasamhita.github.io>



StotraSamhita

Credits